



夢澤集卷之六

黃岡王建陳壇

詩

陳魯南太史使楚還晤于江上因贈

三首

校書辭漢闕持節到江城 萬乘臨軒送

諸侯擁篲迎王人周室禮神女楚臺情詞

賦兼文物知無負此行

其二



睦族遵堯典。親臣踐楚郊。北門虛視草。赤社重分茅。不以雲泥隔。猶憐江海交。皇華勞藉慰。玄困任人嘲。

其三

何意大江濱。蒼茫接所親。相看鬢已變。轉盼迹俱陳。予是浮湘客。予為哀郢人。嚴程不我駐。臨路倍沾巾。

偶出

偃蹇蒼巖畔。沿廻碧水灣。鳴琴林竹下。洗

憤島藤間。是處雲留日。餘生天與閒。徘徊山徑裏。指點暮禽還。

進舸

進舸清秋暮。吟風錦樹開。前鳧衝棹散。後鴈逐帆來。石出灘聲轉。沙明月色迴。欲知臨泛未。試看曙光催。

訪董內方太史于漢口舟中即席投贈二首

漢廣來非偶。人遐會亦奇。獨趨金馬去。暫

遣白鷗隨泛舸。疑牛渚。彈冠想鳳池。當憐
澤畔侶。顛顛不勝悲。

其二

每憶朝端舊。寧期漢上逢。舉杯酌鸚鵡。吹
笛擁魚龍。天遠江俱盡。楓迴渚自重。知君
欲解纜。為我且從容。

宴角呂氏園亭即事遂成艷曲二首

賓客醉華堂。情親向曲房。佳人牽架蔓。稚
子搦池楊。風起青蘋末。雲生錦石傍。勿云

天日暮。銀燭散朱光。

其二

曲榭恣當緣。名園更接連。引枝分檻果。撥
藻數盆鮮。醉舞花低戶。嬌歌鷺近筵。儘教
歡樂極。莫負艷陽天。

夜坐庭前棲鳥不驚

側識安巢意。那堪繞樹悲。風寒難自穩。月
白更須疑。烏鵲仍三匝。鷓鴣但一枝。單棲
復如此。何有上林思。

劉氏雙挽

高里風雲變。松丘歲月深。劍埋龍並逝。簫
去鳳俱沉。鬱鬱楸梧氣。悠悠伏臘心。承家
看令子。壯節比南金。

寄楊太常 武陵人

屈宋流傳古。丘園道路賒。湘潭題柱若。源
水問桃花。黑髮遺朱紱。青山卧綵霞。春霄
日歸鴈。早晚惠瑶華。

遊武昌江龍盤磯寺

巨石表江心。花宮傍太陰。天寒龍卧穩。雲
迴鴈飛深。棟宇飄明鏡。汀洲響梵音。慈航
向夕渡。轉覺慈林。

與客夜宴舟中

宵岸移星舸。秋尊欵月扉。弄珠疑漢女。鼓
瑟憶湘妃。聽曲魚龍出。撩筵鷗鷺飛。天寒
不覺醉。斗轉未言歸。

送王洪德入蜀

落落幽并客。栖栖荆楚顏。遙知問卜去。或

是泛槎還。雲雨經三峽。風煙犯百蠻。看君壯遊志。去矣杳難攀。

張子魚過訪

故人天上至。清宴夜深開。澤畔微芳度。江皋暝色迴。楓林停翠幘。月岸擁金罍。正苦歡娛逼。無令候吏催。

送傅子歸豫章

歲宴向何處。云之故國天。行當臘雪盡。歸及春風前。片帆九江影。瀑布廬山泉。送君

何所托。為吊石灘賢。

石灘舒國蒙別號也

楚眺

眺迥臨高閣。江湘萬里餘。草邊雲夢穢。花下武陵漁。白日山川氣。清秋水竹居。仙踪同霸業。消歇總愁予。

夜過邵子草堂

覓徑依林薄。傳杯竟夜分。曲堤盤古月。老樹宿寒雲。室靜江鳴徹。山空鬼嘯聞。倦來吾謝去。明發過論文。

江上贈羅汝延太守二首

君今握印綬。吾已息柴荆。空舸寒初繫。風汀晚更鳴。雲霄五馬貴。江海一鷗輕。贈子以何物。中洲攬杜蘅。

其二

獨釣江城暝。相逢水國寒。滄浪漁父曲。綵鷁使君灘。雪後雲增白。楓迴岸匝丹。一麾當歲晚。行路莫辭難。

雪中喜涂生數來

念子貧到骨。徃往頗自貧。未辭東郭履。頗泛剡溪船。彈鋏竟不遇。吹簫古有然。蛟龍本神物。變化知何年。

夕渡訪友人

暝色滿清川。幽人何處邊。山腰翻落照。水面沒遙天。賈叟灘煙合。漁歸岸火懸。剡溪今夜棹。乘興不言旋。

登武昌西山絕頂二首

昔日望懷徒積積。今登氣益雄。壺觴飛鳥外。几

杖入雲中。地引江湖盡。天合澗壑空。壯心
殊未已。浩嘯倚長風。

其二

山迴人躋倦。雲長鳥去遲。天中傾竹葉。日
下把松枝。石想吳王劍。城吟謝客詩。醉歸
臨渡處。應與夕陽期。

宿龍蟠磯寺中

龍象開靈嶼。龍鬘戴法筵。石間攢寶樹。鏡
裏湧紅蓮。香氣潭烟接。燈光岸火連。禪房
風浪逼。永夜不成眠。

晨渡望龍蟠寺

石拔煙霞抱。舟迴浦溆通。樓臺疑蜃市。鐘
鼓識龍宮。寶樹繁波上。金花落鏡中。何時
登彼岸。一洗世緣空。

寄上富順王殿下

南國諸王館。池亭獨有名。楚風蘋未勁。淮
月桂叢明。中物醒先析。當天暈已生。無令
為善樂。專美漢東平。

戲贈西陽子二首

西陽談道術。冬日尚絺衣。啓戶歡晴旭。無
衾憚夕暉。黃金慚不就。白髮欲何歸。饑餓
朝來迫。蓬頭叩我扉。

其二

未試餐霞術。空傳煮石方。三旬九九食。顏
面頗倉皇。灰冷燒丹鼎。香餘賣藥囊。嚴寒
君少畏。歲已逼青陽。

春日山居即事五首

草動三江色。林占萬壑晴。籬邊春水至。簷
際暖雲生。溪犬逐船犬。隣鷄上樹鳴。鹿門
何必去。此地可躬耕。

其二

瓜地斜侵浦。茅堂曲抱山。琴書青竹裏。枕
簟綠蘿間。累日頭無櫛。浮雲心自閑。交遊
漸稀少。雙戶晝長關。

其三

築室清溪曲。為園古道傍。苔痕侵戶牖。雲

色上衣裳。牧笛依青草。漁舟隱綠楊。偶然
幽興極。搔首放歌長。

其四

繫舸籬傍樹。開渠檻外流。竹烟藏曉嶂。花
氣覆春洲。玄鳥營巢至。陰虫逐侶遊。生涯
堪放浪。何必世人求。

其五

野曠林爭出。花深徑屢迴。春風芳草上。亂
水白雲隈。燕接飛虫去。鶯清落絮來。小堂

宜竹護。一一荷鋤栽。

送王知事還蜀

佐郡已三載。還家無一錢。苦心成白首。達
命任皇天。峽東秋江怒。雲盤古棧懸。歸來
楊子宅。寂寞守吾玄。

丁酉之夏。觀文溪子於大江之濱。與
之述往歲時。命酒坐石。揮涕而別。太

息成詩

滄海離群久。艱危更可傷。一庵堪白首。萬

死出南荒。天人蕭湘關。風聲鶴鶴揚。垂堂
古有戒。去矣慎毋航。

李衣兩生過飲

駕枉潛夫室。堂開上客筵。雖吾夫人行。愧
汝兩生賢。春去海花艷。年來倦草玄。吁嗟
老將至。何以使名傳。

江上

晴日麗芳洲。春風振碧流。靈均蘭可攬。神
女珮堪留。漁豈臨淵羨。仙因入海求。機心
息已久。自喜不驚鷗。

寄汪子

憶當武廟末。並上漢庭書。放逐時皆散。音
容日以踈。諸君不遠復。獨我遂幽居。鐵羽
當年侶。翻飛迥不如。

其二

不合輒投簪。高踪衆所欽。波流奮獨往。海
嶠發孤吟。雖滯秦稽跡。猶懸魏闕心。徵書
行且至。棲遯不宜深。

其三

自免一何勇。邴生誠我師。可為智者道。聊
愜幽人期。歲月任公釣。登臨謝客詩。肯令
滄海岸。重勒北山移。

其四

羣公方議進。吾子獨初衣。即市稱大隱。於
星應少微。鵬圖無近適。鳳覽有餘輝。高二
遊已久。非君誰與歸。

其五

自爾稽山卧。風猷較古多。名流掩王謝。遊
客結羊何。洲島馮軒得。雲霞岸幘哦。頗嗔
冠蓋訪。不厭野人過。

贈邦伯吳公

予慕古循吏。人稱新使君。雖然改絃鼓。不
以治絲棼。退食溪毛飲。公庭鳥毳紛。良哉
二千石。名已漢皇聞。

退迹

混迹依田父。全身學道流。每隨兒牧豕。一

以已為牛。民擬無懷氏。身如不繫舟。小溪
桃盡發。還似武陵遊。

友有被謗而褫其官者。詩以慰之。

省已良非過。於人乃不孚。文身棄章甫。按
劍對明珠。去位賓朋散。還家儋石無。丘軻
亦偃蹇。汝困勿嗟吁。

有感

萬事不復理。此生從所之。自知心匪石。誰
念鬢成絲。得失事非偶。馳驅數已齊。雖然
罷通籍。飽飯亦思私。

遣興

深岩懶出林。習靜欲忘言。幽苦雲霞變。溪
憎鴈鴛喧。遠生聊可托。智者始堪論。久絕
青雲想。從教白髮繁。

觀漲

孤嶼崇朝失。平疇一瞬深。室廬淪水府。網
罟入雲林。實想輕舟濟。虛疑陸地沈。敢與
微禹嘆。側識敬光心。

江上送吳子

番老難為別。那堪落木紛。雲霞綠岸合。鳧
鷺觸船分。霜浦蘊尊竭。風城玉笛聞。此生
湖海上。何日再逢君。

舟夜

澄潭宜夕霽。倒岫入波流。宿槩依楓岸。張
筵回橘洲。露繁鮫女泣。月瀉翠娥遊。窈窕
羣仙接。無煩海上求。

過張道士方丈二首

欲尋方外信。奈迫區中緣。石髓不可遇。山
房聊借眠。虛堂上。逃漢起。竇德出。關傳。何日
丹砂就。驅鶴上九天。

其二

洞壑隣鮫館。煙霞繞鳳臺。神君當晝下。仙
客御風來。瑤草侵堦長。桃花覆水開。願言
分玉醴。坐遣壯顏回。

得陳魯南書感而賦此

與子才非敵。於予意頗親。歸來各且楚。老

云竟參辰。忽枉兼金訊。長懷如玉人。此生
重見否。數過益傷神。

寄顏惟喬五首

馬卿才豈劣。狗監薦難逢。近老時名損。長
貧世事慵。昂藏身是鶴。變化德猶龍。道大
如君者。斯人且不容。

其二

聞子幽棲處。絕無人世喧。琴書元粟里。鷄
犬似桃源。雲影畫垂席。溪流春到門。寸旌

早晚至。白首去丘園。

其三

身棄名何賴。才高世總遺。著書唯木榻。遠
害獨荷衣。游夏辭難濟。聞雅春秋作漁樵
迹近微。時能共童冠。溪上詠而歸。

其四

道困已如此。年衰將奈何。有時傳郢曲。落
日更商歌。長夜真難畫。陽春未擬和。祗應
具舟楫。乘興數相過。

其五

昔君為亳守。談笑靖虜塵。郡已殲豺虎。時
翻忌鳳麟。奇功元不賞。直節竟無隣。後代
看今史。方知社稷臣。

贈隣叟

屈曲溪迴谷。青青樹隱村。深山無甲子。老
境有兒孫。畏吏棲鄉井。逢人問國門。漁舟
花下入。還似武陵源。

訪友人

同是棲巖者。今為山谷求。攀稽造命駕。訪
戴不回舟。麗日青蕪郭。香風白芷洲。親交
近零落。願子晚綢繆。

祖塋前溪邊穫稻

跡緣桑梓重。心厭稻粱謀。祖德何能述。農
功此暫留。黃雲般隴熟。白鶴喚汀洲。正苦
蒼山暮。那堪碧樹秋。

哭江景孚二首

昔獻金門賦。曾追玉署遊。碧山憐息馬。丹

壑嘆藏舟。壯志風雲散。遺書館閣收。延陵
徒把劍。何日掛松楸。

其二

子已先朝露。文章失鳳毛。人皆惜年少。天
亦厭才高。學草餘池墨。流芳托楚騷。因之
念朋侶。寥落半蓬蒿。

過倪道士故居二首

服食知非誤。先期汗漫遊。開門山鬼嘯。何
處谷神留。丹訣乾坤秘。玄文海嶽收。誰知

松子宅。亦有世人憂。

其二

寂寞雲君錄。摧殘鳳女臺。海田猶有變。洞
壑豈無哀。始學乘牛去。終期化鶴來。室餘
金竈火。千古不成灰。

喜張子自滇至

故渚依黃鶴。長途自碧鷄。瑤華歸有贈。寶
劍去魚携。驥足衰難展。羊腸險遍躋。從今
無復出。溪上伴鳧鷖。

山莊雜興十首

老夫諳稼穡。次第葺園廬。對酒嗒田父。呼
門絕里胥。桑麻經雨後。花竹宛秦餘。如此
生涯足。何勞薦子虛。

其二

事去心逾壯。年來迹轉孤。濯纓臨漢沔。安
枕荷黃虞。春澗偏魚鳥。秋窓近竹梧。出逢
隣叟飲。醉倩野童扶。

其三

避人開石戶。覓物坐山堂。洲柳寒增色。河
蘿晚更香。卜居悲楚客。招隱憶淮王。寂寞
吾甘守。浮沉念總忘。

其四

計拙堪時棄。謀生托野人。鶯花無物事。木
石有比隣。溪上思龍蛭。林間學鳥伸。逢人
無一面。語契卽情親。

其五

天地一虛舟。浮沉雙白鷗。半生從失計。萬

事不關愁。山月杯中映。江雲几上流。狂歌
人莫測。吾興屬滄洲。

其六

圃坐晴逾暈。曉行晚更宜。客從蘿徑入。自
笑葛巾敝。果熟山禽戀。林馴野鹿隨。憑欄
契物理。衛足頗欽葵。

其七

樹古村墟僻。江寒邑里秋。過雲頻送目。累
月不梳頭。廢禮緣多病。求仁未寡尤。呼兒

問網罟。明發上漁舟。

其八

葉減山爭出。林秋景故偏。候虫喧冷砌。過
鴈影晴川。月酌沾松露。楓吟雜澗泉。何人
會幽興。寂寂自鳴絃。

其九

物換竟誰使。朋來非我期。曙光隨日薄。秋
籟入雲悲。速婦聞新醞。從兒誦古詩。自為
真率飲。忘却鬢成絲。

其十

蘿軒時散帙。苔澗亦垂綸。翠竹供詩遍。蒼
林佐酒頻。岫重遲見旭。源曲易迷津。早契
沈冥理。難為俗子陳。

立秋日陪七澤兄飲

行年差近老。流序忽驚秋。雖奉連枝喜。其
如一葉愁。孤煙沉邑井。返照入林丘。少日
青雲志。相看恥未酬。

春盡

春盡人將老。庭閑晷獨遲。絮飄兼鶴毛。花
落罨蛛絲。石溜依琴澗。雲陰入戶移。幽悽
偏水竹。晚步故臨池。

送人

君移夏日棹。去作越中遊。臘意含新柳。春
聲隱凍流。南行探禹穴。東望接蓬丘。湖上
風光好。鶯花累月留。

九日同田子宴武昌西山

令節樊山宴。深秋楚客哀。雲長一鴈往。江

遠片帆來。倦倚丹楓。回看蒼渚開。登高
復能賦。知爾大夫才。

秋日寄劉子

直道古來少。如公迥不羣。結廬衡嶽下。垂
釣古江濱。竹向皇英覓。雲從赤帝分。慚予
亦楚產。何可擬清芬。

歸自山庄作

萬事形骸外。半生魚鳥間。為農稀出郭。習
隱不居山。晴旭歡獨往。暮春雲倦與還。呼兒
檢賦草。閉戶細加刪。

郊園

獨此郊園寂。兼之徒侶稀。灌園踏碧草。把
酒看翠微。竹晚輕颺度。樓晴片月依。自無
致身策。莫遣賞心違。

送張都閫致仕歸二首

山郭秋陰重。江流畫戟明。亦知南顧慮。其
奈北堂情。去偃龍蛇陣。歸尋猿鶴盟。伏波
今未老。銅柱尚標名。

其二

爾家淮海曲。秋日賦歸來。戎服本儒行。將軍今老萊。舊諳司馬法。兼有季鷹才。寶劍君長拭。無令染綠苔。

宿九峯寺

疋馬九峯下。寒宵萬壑陰。月當層殿起。雲擁曲廊深。煮茗開松閣。焚香對石林。諸天倚愁寂。鐘磬淨塵心。

哭陳魯南二首

九原如可作。諸子孰能儔。隻字都人重。遺書漢使求。龍蛇賢運厄。霄漢歲星收。檢爾平生贈。長吟恨未休。

其二

尚憶論經地。猶聞考牧年。焚魚滄海上。吊鶴白雲邊。竟阻生芻奠。遙悲宿草阡。從茲廣陵散。無復世人傳。

以詩賦呈諸知己

形穢燕人石。心憐楚客詞。自矜小子學。真

愧壯夫為。積歲知多誤。成家恨已遲。抱琴者誰子。絃絕為鍾期。

人有自郢來者。輒有所述。敬賦三詩。帝典隆先德。王心永孝思。一為沛邑幸。重覩漢官儀。民以粉榆復。恩於父老私。普天蒙在宥。茲地特先施。

其二

周王湛露雅。漢帝大風歌。野老提攜聽。邦人感激哦。已爭牛酒獻。道望羽旄過。金石

音當被。乾坤德豈磨。

其三

殿閣重臨日。園陵歷覽餘。閭閻聞警蹕。婦子識鑿輿。谷應軒轅律。山藏大禹書。天文將睿藻。輝煥楚村墟。

宴魏子園亭二首

池館名江國。賓朋實楚材。屏間煙霧濕。鏡裏芰荷開。鶴以吹笙下。魚因鼓瑟來。盡歡須秉燭。歌妓莫頻催。

其六二

近市林依宅。業生桂插天。偶來大隱地。高
詠小山篇。蘿嶼雲歸洞。篁簾月到筵。花間
迷出處。須仗主人前。

一丹過魏園兼觀衆作輒賦二首用前

韻

投李慚無報。如樗分不材。草堂綠主重。竹
筵為誰開。偶與觀魚坐。頻能相鳥來。高城
雖日暮。歸騎且停催。

其二

卜築雖入境。無喧即洞天。買園便水竹。留
客出詩篇。砌鶴晴隨仗。城雲晚駐筵。苦吟
何不就。珠玉爛吾前。

集魏園一丹用前韻二首

名園邀上客。一一豫章材。蓋轉蒼林入。尊
當錦石開。跳波魚自樂。得食鳥頻來。莫厭
相過數。星霜暗已催。

其二

秋至猶啼鳥。林立別有天。客皆中散。駕詩
是少陵篇。翠篠留吟管。丹霞日酒筵。平生
山水調。今日盡君前。

夢澤集卷之六

夢澤集卷之七

黃圖王廷陳撰

詩

戴子

戴子自奇士。鳴鞭入我園。高義膽可吐。悲
歌聲復吞。羞稱三輔俠。不食四君門。拔劍
從此去。指軀行報恩。

秋懷

幽客晚窺戶。農人秋築場。牛羊歸委巷。鷓鴣

鷺下回塘。寒潦蝕叢竹。淒風踈古楊。田園
誰謂樂。坐落亦多傷。

圃內

力疾扶筇出。乘閒採藥行。春林群鳥悅。朝
日百花明。水石留連坐。亭臺次第營。賞心
猶未已。極浦暮雲生。

飲汪氏庄

蕪穢貧家產。悲傷過客魂。野翁談廢塢。鄰
豎入頽垣。石鼎燒松葉。瓷甕藉竹根。那堪

對搖落。寒日下孤村。

家僮舉網獲龜。卽命放之池中。感而
賦此

知與天機協。形為世網嬰。縱歸紆汝困。求
報豈吾情。幸不剗腸死。無妨曳尾生。微軀
難自料。何貴有靈名。

過吳道士山房四首

日月神能駐。雲雷氣可生。石床蒼蘚剝。金
澗紫芝榮。仗劍龍爭役。吹笙鶴自迎。誰知

列仙園今已在江城

其二

塞父人難語。同塵市可藏。步虛朝振珮。禮斗夜焚香。林長金光草。峯開紫翠房。羞稱小山侶。結束事淮王。

其三

石髓邀賓飲。丹書閉戶編。鳳簫仙子下。鴻寶至人傳。滅火遙揮雨。排空或駕煙。遨遊凡幾日。碧海欲成田。

其四

逍遙潛咫尺。變化屬須臾。朱雀來窺冶。蒼龍爲守鑪。瓊瑤林際草。山海壁間圖。但使黃金就。寧悲白日徂。

袁生馬射

生本五陵兒。驍雄主將知。弓彎明月抱。馬過浮雲馳。觀者咸稱善。敵人何敢窺。時平罷征戍。應不困邊夷。

夜坐

生事日蹉跎。將如落景何。馬蹄持自誦。牛角扣仍歌。把燭秋蛾集。開簾夕鳥過。長風自寥闕。颼颼振庭柯。

寄張子魚二首

張衡吾畏友。今已賦歸田。讒口雖三至。嘉名每獨全。劔分終自合。寶棄復誰憐。道遠無由晤。含悽寄此篇。

其二

翫辭時多忌。逢迹術轉踈。一朝懷薛荔。卽日棄簪裾。把酒思玄賦。投魚憶素書。試看當路子。馳騫竟何如。

吊汪子

蘭芳元自禍。玉玷竟誰磨。逝水今如此。爲山復幾何。案餘螢照息。谷更鳥聲多。且未遊方外。臨尸詎忍歌。

溪泛詠水中月影一首

圓景懸初浦。澄川映頗宜。魚龍蟾並窟。荷芰桂聯枝。擊汰珠光碎。沿流璧彩隨。素娥

非不潔。終夕浴漣漪。

春日學宮見雪一首

雪是初春積。人於此地逢。紆迴青帝駕。散漫素王宮。向晦能無昧。當陽忽已融。映書貧士喜。何計緩東風。

初月

舉頭新月上。宴坐北堂時。入攬不盈手。窺粧祗肖眉。萱生桂與逐。蚌實兔偏隨。清光勿恨少。向浦每由茲。

書館對雪示諸子

白屋初鳴霰。青衿此下帷。歡披謝客賦。苦詠曹人詩。莫逐輕盈性。須安寒素姿。林中有杞梓。今盡化瓊枝。

春日郊遊同所知

芳郊聯騎出。竹苑聽鶯遷。共酌陶嘉月。相看憶昔年。病因春事減。窮益故人憐。祗恐聞鷓鴣。花間拚醉眠。

春遊贈劉子

時禽猶嘯匹。歡賞合攜儔。未老懸車卧。乘
春結駟遊。雲光馳翠嶽。樹彩慕芳洲。飲興
無今盡。明朝復此求。

病中得顏子書并見示諸作一首

卧疾當寒景。空齋正爾思。五禽終日戲。雙
鯉遠方貽。文著潛夫論。初傳少女碑。君才
猶不用。如我復何悲。

道院對雪

朔雪無風度。玄宮此日開。飄飄萬鶴集。髣髴
羣五神來。綴洞石垂乳。被巖瑤作臺。晚筵
聞鳳吹。益信在蓬萊。

聞箏二首

楚館名娃出。秦箏逸響傳。徘徊芳樹側。掩
映雜花前。鴈促玫瑰柱。鶯喧錦繡筵。年來
哀怨切。復此感繁絃。

其二

花月可憐春。房櫳映玉人。思繁纖指亂。愁
劇翠蛾顰。授色歌頻變。留賓態轉新。曲終

仍自叙家世本西秦

遣興

并介元殊性。浮湛非一歡。嘯歌聊自適。儕類肯相寬。努力時難值。驚心歲易闌。何能忘魏闕。自分老江干。

寄顏惟喬

竟日無歡緒。臨風懷所知。泥塗今老大。羽翼各差池。芳草未堪折。浮雲空自馳。山中逢歲晏。何以慰相思。

喜阮子自蜀歸寄贈一首

昔厭蠶蠶業。最險今鮑漁。浦深狹中垂。束帶多病合。投簪尋暮竹林。侶長瞻楓樹林。詠懷如有唱。莫惜寄同心。

遣興

向人又落落。爲計竟區區。釣弋祗從好。林廬總冒愚。山風吹薜荔。溪月浸菰蒲。敢擬高賢跡。聊全不肖軀。

過范德和書屋因出所作見示留贈

一首

谷暖亂鶯啼。春晴酒為攜。芝蘭叨入室。桃李自成蹊。黃絹人皆獎。青衿孰可齊。聖朝經術選。安得久巖栖。

十五夜觀月同所知

南樓頻遲客。西園復張筵。賞屬清宵厭。心從碧漢懸。玉輪光始滿。紈扇影初圓。竟夕渾忘寐。斜輝益可憐。

八月十五夜對月獨坐

月當三五滿。絕勝是今宵。夾露蘭光濕。含風桂影飄。謝客懷空結。西園誰見招。徘徊星漢側。吟詠亦逍遙。

對雪

銀霰寒帷集。瑤觴倚檻揮。看梅花早落。入柳絮先飛。飢鳥不避戶。凍雲偏坐衣。青陽雖稍近。終未勝寒威。

舟中對雪

朔雪度江樓。蕭蕭生晚愁。輕迴青雀舫。密

隱白鷗洲。游女珮堪擲。宓妃璫可留。無媒
向空闕。含思對滄流。

夕飲曾園。今春日復往。焉故有此作。
名園重繫馬。麗日此開尊。凍解溪聲亂。暄
回林氣繁。轉憐花識面。更覺鳥能言。祇恐
春光盡。留連日易昏。

志感寄京邑友人

棄置已如此。飛翻知幾時。不材堪比櫟。陋
質免為犧。抗論復誰信。壯圖空自悲。敢云
絃似直。實有髮如絲。

贈舒子二首

亦有振子意。其如吾力微。槍榆聊自適。濡
沫暫相依。只天楚推儒行。風霜損客衣。生涯
雖濩落。奇氣尚翻飛。

其二

一從棲楚地。兩見改楓林。岐路興長歎。江
山入苦吟。交遊盡逢掖。登眺幾開襟。誰謂
貧為病。高風益可欽。

夜坐

晚林虛白室。淨几太玄經。養拙關幽獨。凝思啓性靈。空階沉霽月。懸牖內秋星。不寐時披戶。流飈暗激螢。

江上送吳明府以讞赴沔陽

盤錯才能辦。明威獄可孚。非緣審虞芮。那得泛江湖。琴和雲間鶴。鳥隨波上鳧。簡書雖可畏。魚鳥亦堪娛。

豫章陳生紀善堪輿詩以贈之

汝擅青烏術。頗爲黃鶴遊。山川委情狀。歲月傍窮愁。善補神功就。能令鬼福酬。高蹤何所似。漂泊一虛舟。

春遊

晴日動春沙。乘閒到水涯。開顏聊自媚。得意欲誰誇。躋磴時捫葛。尋源屢入花。江山憐病客。行坐惠烟霞。

奉酬皇甫百泉雪中見過留贈之作

三首

積雪惟僵卧。衝風故寵臨。飄揚任客性。高
潔直臣心。懷瑾鮮可示。投珠誰見欽。賴語
消息理。庶緩白頭吟。

其二

雪裏使君至。光增孤白鮮。玉珂鳴死轉。瑞
草踏畚緣。刻曲偶移棹。郢歌堪被絃。報瓊
慚未可。寡和古今然。

其三

含香辭漢署。投賦吊湘纍。白璧竟誰惜。素
絲誠我悲。豈圖當雪夜。聊得協風期。丘也
君能學。應知涅不淄。

贈庾子

嗟爾老風塵。名堪高士鄰。他鄉長作客。異
術耻干人。月酌江城夕。花吟楚岸春。萍蹤
任流轉。隨處有交親。

中麓二首爲李吏部賦

聞說胡山勝。雲霞萬壑平。登丘望遠海。送
日寓高情。鵬激天風起。鳥隨曉日生。降神

元有自。應繫百年名。

其二

迴望蒼煙合。從中素業留。高深開隴畝。伏
臘感松楸。俯瞰朝曦上。晴看海霧流。主人
棲省署。魂夢此相求。

贈張子

自遂歸田卧。何曾入郭行。比鄰稀識面。州
郡祇知名。但結漁樵侶。寧關婚嫁情。溪潭
垂釣處。日見白鷗迎。

寧公房對竹

雙樹謁空王。叢篁隱上方。欲窺童子偈。因
憇此君堂。法雨晴階濕。香雲午院涼。招邀
竹林侶。同醉給園傍。

遣懷

齒髮本非故。沉冥朝復昏。扶衰綜上藥。謝
客偃中園。通顯多相棄。達生聊可論。壯心
隨草莽。末路信乾坤。

自團江赴黃。倏忽望見城郭。欣然賦

此

野水平侵岸。澄江穩放船。櫓聲雜鼓吹。檣影曳雲煙。漫逐群鷗後。俄驚百雉前。長風如可假。乘夕向遙天。

與數客偶至一所率爾題壁并示同遊

茲地豈不邁。吾儕今始逢。林深睥睨入。迳古剪刀通。壤石無他異。琴尊幸此同。一丘雖絕小。心賞獨難窮。

對雨

晚岫雲全出。春江雨半吞。春氣先占礎。潤聲急訝盆。翻簷溜垂依。戶渠流欲潰。垣吾方厭塵垢。天爲淨林園。

別墅邀賓

與客過林塘。留歡出所長。投壺按魯鼓。弄笛據胡牀。屏跡愚爲谷。逃名醉是鄉。二三同志者。倘肯恕吾狂。

晚泛

投林衆鳥疾。薄暮孤帆開。落日似相逐。前
山恍自來。雲霞互明滅。風浪爭喧騰。待月
面洲渚。徒嬰逝者懷。

訪百泉先生

謫居皇甫子。獨步帝庭才。吏隱門常閉。賓
朋途始開。求羊非我輩。驅馬爲君來。向夕
香風度。澤蘭誠可哀。

其二

憐君公府內。而乃構幽居。暇日頻招侶。無
時不著書。悲歌行自激。直道向人踈。放逐
空嗟久。誰聞薦子虛。

初夏遊西山歸作

東陸銅渾改。西山石徑迷。暑者輕經夏。淺緩
步獲高躋。列岫映杯小。孤雲行几低。江天
霽色裏。客散欲聞鷄。

陳叟

固窮誰得似。况愛竟何如。齊客空彈鋏。盧
卿枉著書。徒勞明駐馬。無補釜生魚。寂寞

人云苦。君顏日每舒。

其二

生事緣儒誤。傷心近老貧。一餐資弟子。數口仰交親。身屬工詩病。人譏貫酒頻。時瞻戶外屨。多自是問奇賓。

與二客留酌竹圃

林當大道側。客出古城隈。欲就七賢飲。還邀二仲來。鳥聲流碧樹。人影墮蒼苔。不必淮南桂。淹留日幾回。

別業偶題

紛紛車馬地。寂寂丘園身。始悟閒門趣。非關遠市塵。入林先稚子。分饌及農人。日暮駕言返。涼風吹葛巾。

其二

耽晴出今日。待雨耕後時。農事豈不苦。福心良所宜。塵衿逢水浣。露坐任風吹。散髮烟墟裏。行歌誰復知。

贈別皇甫百泉

憐君辱刀筆。愛客具琴書。奇字人堪問。能
名孰可如。鳥因求友至。羊以敗羣除。飾吏
須儒術。應知用不踈。

其二

一從辭上國。每恨寡論文。與子時相見。令
予日有聞。偶來珠復去。暫合劍仍分。倘賦
相思曲。因風報楚雲。

其三

赤壁嗟左流。寓金陵。昔量移。遲迴今日別。迢
遞夏雲隨。故國三。口天接。王宮六代遺。之
無過里。去住愜心期。

其四

江路指姑蘇。蘭橈入畫圖。客深語楚語。家
近聽吳歎。親愛唯貪聚。君恩實恐孤。過庭
凡幾日。復作省中趨。

夏日山居即事

市逼村非遠。城紆路亦長。藤蘿青壁樹。雲
鳥翠微堂。林日晴多蔭。溪風午薦涼。北窓

時偃卧。人代接羲皇。

其二

寂寂郊原室。悠悠野客心。蒼林鳴鶴起。白石飯牛吟。坐翫高雲變。留連片雨陰。回車山逕晚。多露畏相侵。

其三

澗古苔長蒲。林深迳復微。偶經松竹處。聊挂薜蘿衣。水鳥窺籬落。山雲拂檻飛。農人驚節邁。負耒夜深歸。

其四

相過嫌俗駕。自贍愛貧家。陶令門前柳。秦人洞口花。試暄看野馬。占曙聽林鴉。耕稼誰云苦。吾生幸有涯。

其五

開門臨巨壑。扶杖入平沙。雨後桑麻長。風前楊柳斜。仰天歌自勞。休隴聽農誇。應笑穰田者。篝車望已奢。

其六

寂寞翻爲樂。漁樵更可親。林臯無俗務。草澤有閑人。祇欲全踈拙。非關慕隱淪。偶然隨稚子。驅犢古江濱。

別空山陳子

之子憶南州。行行且復留。頻年悲旅食。五月問歸舟。守黑雖卑術。談玄實雋流。秋風期返棹。遲汝上江樓。

園中作

林間先自僻。農圃近相安。不樹千株橘。猶

滋九畹蘭。放歌山答響。得酒月留歡。就枕夜方寂。空齋聞遠灘。

得友人書感而賦此

少日同聲者。書來祇數行。二毛知鬪絕。雙鯉恨淒涼。久賤親交棄。無求老態狂。世情那可問。明發泛滄浪。

閒步

卜築蒼巖畔。爲園碧水涯。浴童依淺瀨。浣女散晴沙。中散林惟竹。東陵圃是瓜。村頭

歸欲暮。巾服映殘霞。

寄友人

獨立向江天。相思隔暮煙。草玄從客笑。衰
白故人憐。五嶽幾時去。一丘長晏眠。幽懷
何所寄。叢桂晚逾妍。

別墅卽事

衡宇終朝偃。鄰家此迳分。重林頻翳日。積
水自蒸雲。村暝驅牛返。門閒噪雀聞。野人
休錯訝。樵牧本吾羣。

其二

杖策攜群稚。墟行野色開。泉因剡木引。迳
以逐林迴。遠壑孤煙起。高城片雨來。所欽
人跡罕。吟嘯興悠哉。

送十一叔入試

竹林頻接宴。草澤每憐才。匣劍豈終閉。囊
琴今始開。南園鷗激水。北首駿登臺。戰勝
知能事。秋風揚策回。

贈東甌鄭磐石山無留其北上

挾冊來何地。投詩謁我廬。能工四聲韻。無
擅八分書。貌與葛巾古。心從蓬鬢疎。君無
羨京洛。且學楚江漁。

其二

懷寶不獲售。栖栖客楚鄉。詞高凌幼婦。篆
古逼中郎。相士因貧失。依人戒醉狂。朱顏
俗所薄。感激欲沾裳。

翟汝和雅善聲詩。無工圖繪。浪迹荆
郢。高視時人。一方縉紳。爭先迎致。潦
草點綴。價比南金。然汝和不屑也。今
來謁予。詩以贈之。

翟生負性氣。自許更無前。對客詼諧捷。評
人笑刺偏。頗為豎儒罵。每荷名公憐。圖畫
知非志。無令好事傳。

送戴中丞歸

落魄郢中客。銷魂澤畔吟。久捐和氏寶。且
伏直生金。君勿憂多口。人當諒此心。行經
武夷下。須上日南岑。

其二

歸去豈不樂。聊為留滯吟。竟何汚白壁。暫亦鑠黃金。以我常失意。於君倍感心。讒人行且得。安可老雲岑。

泛鮑塘。塘在元祐宮前。用顏漢東韻。時顧司空袁傳二中貴在坐。

錦纜仙源接。銀璫帝邸來。駿驥臨水映。鷗鷺觸船開。秋籟清商發。晴宮紫氣回。再來桃水路。莫遣世人猜。

其二

玄宮金閭碧。秋沼水澄清。槎泛還依斗。簫鳴且勸觥。筠籠持棗獻。芳餌得魴烹。鶴駕何山假。招攜伏友生。

生日有感。簡同館漢東少臬二子。五十來年是。行藏往日非。因之念親舊。存者亦幾希。弧矢心猶壯。文章力已微。操觚從二子。衰薄藉餘輝。

贈王生

近識七山子。居然三楚賢。竹林時偃蹇。蘭澤恣貪緣。莫謂覆盆下。還期揚策前。谷回鄒子律。喬木看鶯遷。

奉別大司空顧公二首

公旦營周禮。諸生媿楚材。紀詳王迹起。閣重帝鄉開。獻歲書從入。乘春節與回。園陵望不極。淚盡漢江隈。

其二

棄置時將晚。踈狂性未移。頃緣外史召。得赴尚書期。白雪竟誰和。青雲非我思。泥塗荷知己。瞻戀不能辭。

賦石泉贈施子

施生美少年。結廬依石泉。搗泉淬寶劍。坐石鳴朱絃。自子表孤派。從茲赴百川。臨流時洗幘。勺水漾青天。

奉懷賓雲

吾宗賢伯子。未老已懸車。黃綬不屑縮。清尊寧遣虛。羅傷廷尉宅。書滿鄴侯廬。隣屋

如堪假從君此卜居

賦空山贈陳子紀有序

陳子紀客遊沔鄂以堪輿家稱然其人實儒生雖迫貧驅終歲奔鶩卒卒無須吏問而不廢詩行坐輒口微哦至斗酒暢酣則仰天掀髯豪吟不絕隱隱稍自矜許似莫測即其詩徃徃中法程可誦吾里二三輕俊實不解詩見其吟也作勢狎之曰客子卑卑

何得詩紀唯唯下之稱不敢而中實傲覲包矣彼又善譚括世俗諧語應事出之輕重采悉得予或憤鬱與之談輒解頤此其醞藉豈常調哉嗟乎古稱相士失之貧彼皮相之士顧何能得陳子矣今來以其號空山請曰公知我幸為我賦空山遂援筆成此贈之

已華俗子調遂結山靈知獨徃似逃侶偶

來非赴期。靜聞颺颺。嘯動見烟霞。墮巖洞。
晚歛仄。言歸當勿遲。

贈戴醫

戴醫方弱冠。流輩不能如。何自受神術。非
徒讀父書。其父亦名醫而衰殘年賴保。
瑛術實滋出故云延致日無虛。尚有耽詩癖。煩君藥與除。

定惠院宴集四首

三載不一至。朝來當暮春。江山宛如昨。花
柳幾回新。信美仍吾土。招邀且故人。相看

惜一醉。魚乃負佳辰。

其二

石磴接巖扉。行行上翠微。賓朋花下至。雲
鳥竹邊飛。韶景度欲盡。舊遊存苦稀。蘇公
何可作。今古一沾衣。

其三

結侶乘暄出。憑高望眼開。閭閻深負渚。阡
陌曲侵臺。展席春雲映。歸軒夕鳥催。回看
遽陳跡。相送轉徘徊。

其四

佳境不可厭。芳時聊爾尋。一披遠岫色。兼會澄江心。放誕從吾適。遲迴屬所欽。不知同醉者。後此幾同臨。

府治內禮賢堂落成。桐岡君張宴於

此。以招郡之耆舊。予固匪人。幸奉杖

屨。茲九月八日。吾輩亦就此供具。少

展謝私詩曰。躋彼公堂。稱彼兕觥。此

之謂也。乃即席賦詩四章。

九日明朝是。先期楚客狂。競攜田父醞。同

上禮賢堂。難響來官舍。雲陰過女墻。當關

幸不擾。綏綏世。而罄杯觴。

其二

逐侶入逡巡。琴尊就此陳。急娛朱紱客。預效白衣人。更迭前為壽。流連晚益親。與堂私借問。底事主為賓。

其三

吾儕每一見。輒頌使君賢。治出龔黃公。石精

將竹素偏。訟庭乘暇日。罷閣禮高年。異代
今朝飲。長為故事傳。

其四

高情報恐後。是日出田家。久擬輸芥子。何
能待菊花。庖厨依粉堞。巾服映丹霞。款語
須分記。明朝向客誇。

湖上言懷二首

依依一水上。况值沍寒時。非漁復非隱。自
笑還自悲。應時脩網罟。終日對鳧鷖。興至
泛舟去。尋源歸每遲。

其二

微利素不屑。衰年緣底忙。祇因迫婚嫁。遂
爾逐漁商。貨殖豈吾道。浮沈聊此鄉。交遊
從見絕。鷗鳥日相將。

病目小愈志感

病目經三月。茲醫遂稍辨。人真憐長夜。日已
負一年。春庭藥闥應徧。園禽聽轉新。誰云
今小愈。念往益傷神。

小齋執熱。燥鬱可知。風雨忽來。形情
稍適。於是期故人之再至。望神女之
少留。乃賦斯篇云耳。

苦熱何能避。歡棕此暫裁。風因解愠至。雨
為濯枝來。脫帽披軒出。褰裳遶迳回。行雲
忽不見。日極楚王臺。

一雨數日不絕。田畯抱病。獲之憂。予
聞而嘲之曰。甫幸其潤。隨忌其淫。然
則天之欲媚於人也難矣。感而賦此。
沾灑初回槁。沉冥乃積陰。未成書喜雨。轉
欲賦愁霖。天地竟何意。吾人還此心。安能
即開霽。疇隴慰悲吟。

送鄭公北上

離筵開祖道。別駕向神京。蜚輓王程急。馳
驅官况輕。處膏元不潤。濯水自知清。好為
司農道。蒼生望綬征。

李生向予言曰。妓有名秋水者。頗麗
人也。戲賦秋水。

楚客誇秋水。令予發興新。漢槎頻訊石。洛
機自生塵。日集鴛鴦侶。時來鴻鴈賓。不緣
風浪隔。長作問津人。

奉酬桐岡公病後見惠之作

多病身仍健。同聲思轉牽。暫能逃簿領。日
每費詩篇。勿藥占非謬。加餐勉自憐。黃人
爭祝願。天眷使君賢。

石泉施生從余遊湖上數月忽中夜
不寐枕上聞過鴈求曹之聲悵然有

懷郊郢故人。詰旦束裝向余求。去余
不能留。詩以紀別。

歲暮何所適。孤帆溯漢源。汝懷中散駕。予
愧子孟嘗。酒盡即分手。囊空唯贈言。如逢
郢中舊。衰廢可無論。

雨中喜雲渠李子過訪山庄

老去交情篤。春來野興偏。忽聞衝雨過。遠
候出溪邊。田犬隨人後。山雲落馬前。何能
避沾濕。徐步聽鳴泉。

其二

相隔祗旬月。今逢素髮繁。春林黃鳥集。晚
岫白雲屯。韶景惜逾逝。昵交嗟僅存。留君
宵共寢。往事夢中論。

桐岡先生遷滇南憲副奉贈一首

郭公性本靜。於此五年留。遷晚仍常格。途
遙屬暮秋。冠裳父老乞。篇翰士人收。他日
經行處。應難近竹樓。

夢澤集卷之七

